

ԳԻՏԱԿԱՆ ՆՍՏԱՇՐՋԱՆ՝ ՆՎԻՐՎԱԾ ԱԼ. ՍՊԵՆԴԻԱՐՅԱՆԻ ԾՆՆԴՅԱՆ
100-ԱՄՅԱԿԻՆ

1971 թ. դեկտեմբերի 13-ին տեղի ունեցավ Հայկական ՍՍՀ գիտությունների ակադեմիայի արվեստի ինստիտուտի, Հայաստանի կոմպոզիտորների միության և Երևանի Կոմիտասի անվան պետական կոնսերվատորիայի միացյալ գիտական նստաշրջանը՝ նվիրված հայկական սիմֆոնիկ երաժշտության հիմնադիր, հայ դասական երաժշտության ականավոր ներկայացուցիչ, մեծ կոմպոզիտոր Ալեքսանդր Սպենդիարյանի ծննդյան 100-ամյակին:

Բացման խոսքով հանդես եկավ արվեստի ինստիտուտի դիրեկտոր, արվեստագիտության դոկտոր, պրոֆեսոր Խ. Վ. Զարյանը, որը տվեց Սպենդիարյանի ստեղծագործության հակիրճ բնութագիրը և ընդգծեց այն խոշոր նշանակությունը, որ նա ունեցավ և շարունակում է ունենալ հայ երաժշտական ստեղծագործության զարգացման գործում:

«Ալեքսանդր Սպենդիարյանը և հայկական մշակույթը» թեմայով զեկուցեց արվեստագիտության թեկնածու Բ. Գ. Գրիգորյանը: Նա ցույց տվեց, որ Սպենդիարյանն իր ամբողջ կյանքի ու գործունեության ընթացքում միշտ սերտորեն կապված է եղել հայ իրականությանը և Հայաստանի փոխադրվելը հանդիսացավ այդ կապերի տրամաբանական արդյունքը:

Արվեստագիտության թեկնածու, գոցենտ Մ. Ա. Տերյանի զեկուցումը նվիրված էր կոմպոզիտորի «Երեք արմավենի» (ըստ Մ. Լերմոնտովի բանաստեղծության) սիմֆոնիկ պատկերին, որը

ժամանակին արժանացավ Գլինկայի անվան մրցանակի:

Այնուհետև հանդես եկավ արվեստագիտության թեկնածու Ն. Կ. Թահմիզյանը: Նրա զեկուցումը՝ «Ալ. Սպենդիարյանի երաժշտական լեզվամտածողության զարգացումը» թեմայով, ցույց տվեց այն էվոլյուցիան, որ ունեցավ կոմպոզիտորի երաժշտական ոճը՝ ընդհանուր եվրոպականից դեպի նոր արևելյանը՝ հիմնված հայ ժողովրդական երաժշտության օգտագործման վրա:

«Ալմաստ» օպերայի ժանրային հատկանիշների բնութագրության հարցերին նվիրեց իր զեկուցումը արվեստագիտության թեկնածու Դ. Շ. Գյոզակյանը: Նա «Ալմաստը» բնութագրեց որպես դրամատիկական, խոր հոգեբանական օպերա, որի մեջ առկա է նաև հայրենասիրության թեման:

Արվեստագիտության թեկնածու Կ. է. Սարգսյան-Խուդաբաշյանն իր զեկուցումը նվիրեց «Ալմաստ» օպերայի լիբրետիստ, բանաստեղծուհի Ս. Պառնոկին և ցույց տվեց նրա կատարած նշանակալից աշխատանքը լիբրետոյի ստեղծման գործում:

Գիտական նստաշրջանում կարդացված վերջին զեկուցումը կրում էր «Մի էջ «Ալմաստ» օպերայի բեմական պատմությունից» վերնագիրը, որով հանդես եկավ արվեստագիտության թեկնածու Խ. Ա. Աթայանը:

Մ. ՄՈՒՐԱԴՅԱՆ

ԻՐԱՆԻ ՊԱՏՄՈՒԹՅԱՆՆ ՈՒ ՄՇԱԿՈՒՅԹԻՆ ՆՎԻՐՎԱԾ
ԳԻՏԱԿԱՆ ՆՍՏԱՇՐՋԱՆ

Իրանական պետության 2500-ամյակի կապակցությամբ Սովետական Միությունում իրականացվող գիտական միջոցառումները կոորդինացնող ՍՍՀՄ գիտությունների ակադեմիայի նախագահության հատուկ հանձնաժողովի նախաձեռնությամբ ս. թ. սեպտեմբերի 27—30-ը Լենինգրադում անց կացվեց գիտական նստաշրջան:

Իրանի պատմության կարևոր այս տարեթվի առթիվ գումարված գիտաժողովը կոչված էր Իրանի պատմության ու մշակույթի տարրեր հարցերի մշակման ճանապարհով ցույց տալու նաև սովետական մասնագետների կարևոր ավանդը իրանագիտության զարգացման գործում:

Զեկուցումները նվիրված էին հին և վաղ միջնադարյան Իրանի հիմնական փուլերին (Ա-